



ubd | Universiti
Brunei
Darussalam

TAKRIF DAN KONSEP MELAYU SERTA KESEPADUANNYA DENGAN ISLAM DAN BERAJA

*Pg Dr. Khairul Rijal Bin Pg Hj Abdul Rahim
Penolong Profesor
Akademi Pengajian Brunei
Universiti Brunei Darussalam*

FOKUS KULIAH

Di akhir kuliah siswa/i akan memahami:

1. Istilah kata Melayu
2. Asal usul bangsa Melayu
3. Melayu dalam konteks Negara Brunei Darussalam
4. Melayu dalam konsep Melayu Islam Beraja
 - a) Bangsa Melayu
 - b) Identiti Melayu
 - c) Bahasa Melayu dan tulisan Jawi
 - d) Pengamalan cara hidup kebruneian

ISTILAH KATA MELAYU

‘Mo-lo-yeu’ (catatan tulisan Cina Tahun 644-645 Masihi) - *“orang ‘Mo-lo-yeu’ mengirimkan hasil bumi kepada Kaisar China”*

Tercatat juga dalam buku sejarah China, antaranya Melayu itu disebut ‘Mo lou yu’, ‘Wulai yu’, ‘Ma-lai-ren’, ‘Ma la-yu’, ‘Ma li yi er’ dan ‘Wu ren’ (Ismail Hussein, et. Al (ed.), 1989 : 74-81).

‘Melaju’ (Werndly berpendapat Melayu berasal daripada kata Melaju) bermakna cepat, deras dan tangkas. Orang Melayu bersifat tangkas dan cergas, segala tindak tanduk cepat dan deras.

Melayu berasal dari nama sejenis pohon yang harum baunya.

Melayu lazim diertikan sebagai masuk Islam.

ASAL USUL BANGSA MELAYU

- Suku bangsa yang merupakan penduduk pribumi di Malaysia, Brunei, beberapa bahagian Indonesia terutamanya Sumatera dan Kalimantan, dan beberapa kawasan (daerah) lain di Asia Tenggara (Kamus Bahasa Melayu Nusantara, 2003: 1754).
- Asal usul nenek moyang orang Melayu termasuk dalam rumpun 'Austronesia', yang mendiami daerah lingkungan Thailand, Burma, Kampuchea dan Laos (Indo-China sekarang), termasuk Daerah Khmer di Uluu, dan di hulu lagi ialah Tonkin. Komuniti ini berpindah secara berkelompok menuju ke bawah melalui Siam, Semenanjung Tanah Melayu, Pulau Sumatera, Jawa dan Pulau-pulau Besar yang dinamakan Nusantara (Nusa-Pulau) dan (Tara-Antara) terletak antara China dan India.
- Brunei dan Pulau Kalimantan (Borneo) termasuk kawasan yang dipindahi, maka Brunei tidak terkecuali daripada proses perpindahan tersebut.

Perpindahan Orang Melayu Brunei (Syair Awang Semaun)

*Bersuara pula pateh Berbai,
Masuk ke negeri sungai Brunei,
Sembilan puluh banyaknya ramai,
Sekatiannya itu semuanya Sakai.*

*Sampai di ulu habis ditanggari,
Hanya beroleh yu dan pari,
Pateh memandang kanan dan kiri,
Terlalu patut tempat bernegeri.*

*Awang Alak berkata kepada Demang Sari,
Bersama Pateh kanan dan kiri,
Jikalau terpakai Awangku sendiri,
Ke dalam Brunei kita bernegeri.*

MELAYU DALAM KONTEKS NEGARA BRUNEI DARUSSALAM

Negara Brunei Darussalam (NBD) adalah negara Melayu dengan sistem pemerintahan cara Melayu (Beraja) yang dipandu Islam dan dipimpin oleh Sultan dalam satu masyarakat yang bersatu padu mengamalkan nilai-nilai kebudayaan Melayu dan identiti keBruneian yang mempunyai unsur-unsur kebaikan dan kelebihan.

Memahami maksud Melayu dalam konteks NBD yang berkonsepkan MIB, perlu dikaitkan Melayu dengan ajaran agama Islam dan sistem pemerintahan Beraja. Melayu dalam konteks NBD terpadu dengan Islam dan Beraja.

MELAYU DALAM KONSEP MELAYU ISLAM BERAJA

Melayu dalam konsep MIB dapat dihurai melalui:

- Bangsa Melayu
- Identiti Melayu
- Bahasa Melayu dan tulisan Jawi
- Pengamalan cara hidup kebruneian

BANGSA MELAYU

Rakyat dan penduduk di NBD terdiri daripada:

1. Bangsa Melayu

Bangsa Melayu di Brunei adalah rakyat Sultan menurut kuasa mutlak undang-undang, yang dikenali sebagai 'Rakyat Jati Brunei' yang dikhususkan kepada puak-puak jati bangsa Melayu, iaitu Belait, Bisaya, Brunei, Dusun, Kedayan, Murut dan Tutong. **Rakyat Sultan yang terdiri dari tujuh puak ini adalah menjadi akar tunjang keMelayuan di NBD.**

Umumnya, empat puak jati bangsa Melayu (Belait, Brunei, Kedayan dan Tutong) beragama Islam; tiga puak Melayu (Bisaya, Dusun dan Murut) tidak beragama Islam. Bangsa Melayu di Brunei ditentukan oleh puak jati dari bangsa Melayu di Brunei, bukan dari agama yang dianuti.

Oleh itu, bangsa Melayu di Brunei ialah mempunyai kepelbagaian sama ada dari segi puak, agama, Bahasa dan loghat, kesenian, adat dan budaya.

2. Bangsa Bukan Melayu

Rakyat dan Penduduk Brunei yang **tidak termasuk** dari tujuh puak jati bangsa Melayu, seperti orang-orang Bukitan, Dayak (Laut), Dayak (Darat), Kalabit, Kayan, Kenyah (termasuk Sabup dan Sipeng), Kajang (termasuk Sekapan, Kejaman, Lahanan, Punan, Tanjong dan Kanowit), Lugat, Lisum, Melanau, Penan, Sian, Tagal, Tabun, Ukit dan orang kacukan; bangsa Cina, India dan sebagainya.

IDENTITI MELAYU

Identiti Bangsa Melayu Brunei tersebut adalah:

- taat setia menjunjung pemerintahan beraja,
- berbahasa Melayu,
- berkebudayaan Melayu Brunei,
- beradat istiadat,
- mengamalkan nilai-nilai keMelayuan Brunei,
- menganuti, menghormati nilai-nilai dan ajaran Islam.

“... Pembentukan identiti kebruneian melibatkan beberapa perkara yang mustahak supaya diutamakan. Di antaranya ialah bahasa rasmi negara, yakni bahasa Melayu, dan adat istiadat, yakni adat resam orang-orang Brunei serta kebudayaannya ...”
(Titah 1 September 1982).

Identiti Melayu dalam konteks MIB terpadu dengan nilai Islam dan Beraja.

BAHASA MELAYU DAN TULISAN JAWI

Sebagai sebuah negara Melayu, NBD menggunakan bahasa Melayu dan menjadikannya bahasa rasmi negara dengan tulisan jawi diberikan keutamaan, kesemua ini menjadi jiwa bangsa orang Brunei dan diamalkan sebagai alat pentadbiran, perhubungan, perpaduan, dan pengenalan orang Brunei sebagai bangsa yang berdaulat.

“... Dalam pada itu, beta ingin mengingatkan supaya usaha ke arah mendaulatkan bahasa Melayu sebagai bahasa rasmi negara tidak akan diabaikan. Adalah menjadi tanggungjawab seluruh rakyat dan penduduk di negara ini mengamalkan bahasa Melayu terutama dalam urusan-urusan rasmi menurut peraturan yang ditetapkan termasuklah tulisan Jawi ” (Titah 15 Julai 1988).

Sejarah Brunei terbukti bahawa Bahasa Melayu dan tulisan jawi adalah lambang kebesaran dan ketuanan Brunei. Banyak khazanah kekuasaan ketuanan Brunei menggunakan bahasa Melayu dan tulisan Jawi.

Tulisan jawi datang bersama-sama Islam. Tanpa tulisan jawi agama Islam mungkin tidak berkembang di Nusantara termasuk Brunei.

Bahasa Melayu dan tulisan Jawi dalam konteks MIB terpadu dalam lunas Islam dan Beraja.

IKRAR BAHASA KEBANGSAAN - 23 JULAI 1962

Bahawa kami rakyat dan penduduk negeri Brunei mengaku taat setia serta berbakti kepada negara ini dan kami mengaku memuliakan taraf kebangsaan bahasa Melayu seperti maksud Perlembagaan 1959 Bab 82 (1) (a).

Dengan ini kami mengaku menyokong dan menggunakan bahasa Melayu dalam segala lapangan, serta akan mengembangkan bahasa Melayu dengan apa cara jua untuk menunjukkan kasih dan taat setia kami kepada Sultan dan negara.

Dengan ini maka kami berikrar akan membuktikan sokongan-sokongan kami dengan sebenar-benarnya dengan tidak berbelah bahagi.

PENGAMALAN CARA HIDUP KEBRUNEIAN

Dengan unsur Melayu di dalam konsep MIB, orang Melayu Brunei akan terus **memelihara dan mengamalkan** cara hidup keBruneian yang bersendikan etika, adat resam dan kebudayaan Melayu yang tidak bertentangan dengan nilai-nilai dan ajaran Islam.

Nilai-nilai dalam cara hidup ini antaranya ialah; *taat setia kepada raja dan pemerintah; kuat beragama dan menuntut ilmu; tahan lasak dan berdiri di atas kaki sendiri yang digambarkan oleh nilai-nilai seperti bakarih, bajarih, bebasah bekaring, cakah dan malu untuk meminta-minta; beradab dan bersopan melalui nilai-nilai beawar galat, menuakan dan menghormati yang tua, mencium tangan raja dan ibubapa; jujur dengan sifat lurus; berbudi-mulia melalui nilai-nilai inda camah mata, memucang-mucang kuat membantu orang lemah dan bersilaturahmi; kemas dan sempurna di dalam pekerjaan melalui nilai-nilai lutan dan titih lagi sempurna.*

Pengamalan cara hidup keBruneian yang terkandung dalam unsur Melayu merupakan kesepaduan antara nilai-nilai Melayu, Islam dan Beraja.

KESIMPULAN

Melayu dalam konsep Melayu Islam Beraja bermaksud bangsa Melayu yang terdiri dari tujuh puak jati bangsa Melayu mempunyai identiti Melayu, berbahasa Melayu dan mendaulatkan tulisan jawi yang mengamalkan cara hidup keBruneian yang berlandaskan ajaran agama Islam dan dipandu oleh ketaatan setiaan kepada Sultan selaku pemimpin dan penaung sistem pemeritahan Beraja.

Memahami definisi dan maksud Melayu dalam konsep Melayu Islam Beraja hendaklah dihubungkaitkan dengan unsur Islam dan Beraja .

Maksud Melayu yang terpadu dengan Islam dan Beraja merupakan salah satu lunas yang perlu dihayati dan diamalkan oleh seluruh rakyat dan penduduk Brunei sebagai alat kesatuan dan perpaduan dalam kalangan rakyat dan penduduk di Negara Brunei Darussalam.

SOAL?

JAWAB!





ubd | **Universiti
Brunei
Darussalam**

SEKIAN

JUNJUNG KASIH
TERIMA KASIH

KAPSUL MADANG - 22 OGOS 2025